



Procura da missiuns a Glion

■ (fmr/gc) **La menadra dalla Procura dallas missiuns dallas soras dominicanas da Glion, Christine Imholz, communichescha el novissim fegl d'informaziun «berichtet und beleuchtet» ch'ins hagi elaborau ina nova strategia per ils onns 2021–2025 co missiunar.** Dapi 100 onns che las soras da Glion ein engaschadas era ellas missiuns, eisi adina puspei semussau sco necessari da s'adattar als fatgs, basegns e pusseivladads per ademplir endretg l'incarica missiunara dallas soras dominicanas da Glion. Quella secloma: far dil bien a tuts carstgauns, leu nua ch'il basegns ei il pli grond, independentamein da nazions e religiuns.

La nova strategia duei esser in instrument bein gideivel. Ils discuers tier las sentupadas dalla grupp da lavur ein stai da grond avantatg per la menadra dalla Procura. Igl ei buca mo semussau, co quella ei integrada ella claustra, mobein era semani-

festau, co las soras ein engaschadas duront onns ed onns e co biaras benefacturas e benefactors han possibilitau aschi bia.

Gest ils pli paupers ellas tiaras dil sid han saviu quintar cun la Procura. Las soras sco era las organizaziuns partenarias ein presentas els quartiers dils paupers da divers marcaus. Ellas segidan cun affons e giuvenils agl ur, cun dunnas e famiglias per ch'ins sappi senutrir saunamein, frequentar las scolas, esser en cuminonza e sesviluppar dignamein sco humans. La finamira secloma: Arver vias en in meglier avegnir.

Engaschi concret

En lur Fegl d'informaziun vegn descret, co las soras dominicanas da Glion e lur organizaziuns partenarias prestan lavur concreta missiunaria en Brasilia, Taiwan, sillas Filippinas, egl Irac ed en Guatemala e mussau, co ei reussescha ad ellas da dar ripostras ella crisa actuala sin las sfidas socialas.